

QEQQATA KOMMUNIA

Borgmester

Assartuussineq pillugu Isumalioqatigiissitaq

P.O. Box 909

3900 Nuuk

e-mail: ijen@gh.gl

Assartuussineq pillugu Isumalioqatigiissitap takorluukkanut siunnersuutaasa tusarniaassutigineqarnerini Qeqqata Kommuniata akissutaa

Assartuussineq pillugu Isumalioqatigiissitap takorluukkanut siunnersuutaasa tusarniaassutigineqarneranut saqqummiunneqartumut akissuteqarnissamut periarfissinneqarami Qeqqata Kommuniata nuannaarutigaa. Ataatsimiititaliaaqqap 1-ip – Qeqqata Kommuniata ilaaffigisaata – tusarniaanermi ataatsimoortumik akissuteqarani immikkut akissuteqarnissamik aalajangernera tunngavigalugu akissuteqartoqarpoq, tassanilu akissuteqarnissamut piffissarititaasup sivikinnera aammalu ataatsimiititaliaaqqat peqataasunit isumassarsiuinernik assigiinngitsorpassuarnik ataatsimoortitsilluni allasinnaasumik allatseqannginnera tunngavigineqarpoq.

Qeqqata Kommuniata tusarniaanermi akissutaani, Assartuussineq pillugu Isumalioqatigiissitap takorluukkanut siunnersuutaata tulleriinnilersorneqarnera malinneqarpoq.

Kapitali 1: Takorluukkat

Takorluukkani pioreersuni innuttaasut assartuussinermi sullinneqarnerat pingaartinneqarpoq, tassungalugu atatillugu oqaaseq 'isumannaatsoq' ilaatinneqanngimmat eqqumiiginarpoq. Assartuussineq nunami issittumi aammalu sumiiffinni silamik allanngorarfiusumi ingerlanneqarmat, isumannaatsumik assartuussineq ilaasariaqaraluarpoq.

Takorluukkanili 'inuussutissarsiutinik ineriartortitsineq' amigaataammat malunnarnerpaavoq. Namminersornerup eqqunneqarnerani aningaasaqarnikkut imminut nammassinnaaneq inuussutissarsiutinillu ineriartortitsineq Namminersorlutik Oqartussat kommunillu pilersaarusiorderanni siunnerfigineqassagaluartoq isumaqarnarpoq. Taamaattumik Assartuussineq pillugu Isumalioqatigiissitap takorluukkamini inuussutissarsiutinik ineriartortitsineq pingaartissimanngimmagu eqqumiiginartorujussuuvoq. Taamaalilluni suliaq annertunerusumik utimut qiviarnuvoq, tassanilu pilersuinerup aqutsinerullu oqaluttuarisaanermik tunngaveqartunik ineriartortinneqarnerat eqqarsaatigalugu piunnartussat tunngavigineqarput, assartuussinerullu ilusissaa pilersaarusiorderarluni.

Kapitali 2: Anguniakkat

Taamatuttaaq inuussutissarsiutinik ineriartortitsinerup aallunneqarnissaa anguniakkanut ilaatinneqartariaqaraluarpoq. Oqaaseq "inuiaqatigiinni ineriartornermut tamakkiisumut tapertaassaaq" tassu-

nga immaqa tunngasinnaagalarpoq, takorluukkanulli allattuiffiup sinnerani inuiaqatigiit ineriartornerat innuttaasunik illoqarfinnut aqutsiviereersunut eqiterutsitsinissamik tunngaveqarnerusutut isumaqarfiginarpoq – tassanilu inuussutissarsiutinut periarfissat nutaat atorfinnik imminnut nammasinnaasunik nutaanik pilersitsiffigisaannut innuttaasut nuttallernissaat pineqarani.

Kapitali 3: Ajornartorsiutit tunngaviusut

Allassimasut ajornartorsiutaasutut isikkoqanngillat, allanngitsoorneqarsimasulli taamaappasinnerulutik, tassalu inuussutissarsiutinik ineriartortitsinerup aallunneqarnissaa. Kalaallit Nunaanni innuttaasut illoqarfinnut eqiterutsinneqarnissaannik misissueqqissaarnerup nunarsuup sinneranut naleqqiunneqarnerani nassuiaatit assigiinnginnerat isiginiarneqarsimanngimmat eqqumiiginarpoq. Nunarsuup annersaani illoqarfiit suliffissuaqarnikkut ilisimasatigullu ineriartortitsinermit aallaaviusartut, Kalaallit Nunaanni maannamut ataatsimoorussamik tapiissutit atorneqarnissaat tunngavigineqartarpoq. Taamaattumik Kalaallit Nunaanni nunaseriaatsit siunissami aningaasaqarnikkut imminut nammassinnaasumik ingerlatsinermit, maannamut oqaluttuarisaaneq malillugu ineriartortitsinermit allaanerungaatsiartussaapput.

Tamanna pissutigalugu ajornartorsiutit tunngaviusut inuussutissarsiornermi ineriartortitanut, – tunisassiassanik, nioqqutissianik sullissinernillu avammut tunisaqarnikkut imaluunniit takornarianit, ilisimasassarsiortunit assigisaannilluuniit tikittartunit isaatitaqarnikkut – nunat allamiut aningaasaannik nunatsinnut isaatitsissutaasunut pioreersunut ilimanaateqartunullu nassuiaatinik paasissutis-sanillu imaqtartariaqaralarput.

Tassalu kapitalimi aalisarnerup ineriartortinneqarnissaanut pilersaarutit Aalisarnermut Naalakkersuisoqarfimmiit, takornariaqarnerup ineriartortinneqarnissaanut Inuussutissarsiornermut Naalakkersuisoqarfimmiit/GTE-miit, uuliamik/gassimik ujarlerneq piiannerlu Aatsitassaqarnermut Pisortaqarfimmiit, aatsitassarsiorneq kiisalu inuussutissarsiutinut tunngatillugu suliasatut isumalluafigineqartut allat, soorlu aluminiulorfissaq aamma nilannut imermullu suliniutit Inuussutissarsiornermut Naalakkersuisoqarfimmiit nassuiaasoqartariaqaralarpoq.

Isumassarsiorfissatut uuliamik/gassimik ujarlernissamut akuersissutit aatsitassarsiorfiusinnaasullu pillugit ilisimatitsissutit, tamanna pillugu 2010-mi februaarimi Aatsitassarsiornermut Pisortaqarfiup ilisarititsinerani saqqummiunneqartut, kiisalu umiarsuit sinersorlutik takornariartitsisartut tikittarne-risa ineriartornerani GTE-p paasissutissaatai kingulliit ilanngunneqarput. Najoqqutassani taakkuna-ni inuussutissarsiutit ineriartornerat/ineriartortitassatut ilimanaatillit pioreersut nunaseriaatsit ineriartornerannut oqaluttuarisaanermik tunngaveqartunut naleqqutinngitsut maluginiarneqarpoq. Najoqqutassat taakku piniaqqullugit, aammalu inuussutissarsiornermik ineriartortitsinermit oqartussaaffiit attuumassuteqartut misissueqqissaarfigeqqullugit Assartuussineq pillugu Isumalioqatigiissitaq matumuunakkut kajumissaarneqarpoq, taakkununnгалu ilanngullugu pingaartumik ukiuni kingul-lerni qulini takornariaqarnerup ineriartornera misissueqqissaarfigeqquneqarpoq.

Kapitali 4: Silaannakkut angallassineq: Ajornartorsiutit pingaarnerit

Oqaasertaliornarit, paasissutissanik tunngaviusunik atuinerit aammalu ilisimasanut tunuliaquttat naleqqutinngitsut arlallit kapitalimi atorneqarput, tamannalu soorunami Assartuussineq pillugu Isumalioqatigiissitap sulinerminik ingerlatitseqqinnissaata kukkusumik ingerlanneqarneranik kingu-neqartussaavoq.

Immikkoortumi siullermi Imarpik qulaallugu timmisartunut mittarfinnut tunngatillugu oqaatigineqarpoq; ”Kangerlussuarmut Narsarsuarmullu inissiinermut sorsunnersuit appaata nalaani sakkutooqarnikkut isumaliutersuutit tunngavigalugit aalajangiisoqarsimasoq” Tassani ”piffissaq eqqorlugu tikittartut” aamma sanaartornermi aningaasaqarnermik tunngaveqartut” taamatut inissiinermut tunngatillugu oqaatigineqanngimmata eqqumiiginarpoq. Taamaalillunilu isumaqarnarpoq sinerissami inoqarfinnut qaninnerusumut inissiiinani Kangerlussuarmut Narsarsuarmullu inissiinerni sakkutooqarnikkut isumaliutersuutit tunngavigineqarsimanngitsut. Mittarfiit sinerissami sumiiffinnut allanut inissinneqaratik, nunami ilorpasissumut inissinneqarnerinut piffissaq eqqorlugu tikittarnissaq sanaartornermilu aningaasaqarnikkut eqqarsaatigisassat pingaarnertut tunngavigineqarsimapput. Sak-kutooqarnikkut pissutsit kisimik tunngavigineqarsimasuuppata, pingaartumik mittarfiup Kangerlus-suarmut, kangerluup 180 km-inik takissusillip qinnguaniittumut, ukiup affaa tikillugu sikuusartu-mut, taamaattumillu umiarsuarmik tикиnneqarsinnaanngitsumut inissinneqarnera 1940/41-mi aalaja-ngernerusimassaaq tunngavissaqanngitsaq, pingaartumik ikummatissanik il.il. pilersuineq eqqarsaa-tigalugu.

Immikkoortup aappaani nassuiaat 2-mut ilassutaasoq annertuumik kukkuneqartumik tunngaveqar-poq.

Ilaatigut nassuiaatip aallaqqaataani ilanngussaq A-mut innersuussisoqarpoq, tassanilu Air Green-landip Kalaallit Nunaannut aamma Kalaallit Nunaanniit, kiisalu Kalaallit Nunaata iluani ilaasuisa amerlassusaat kisimik ilaatinneqarput. Taamaalilluni timmisartuutileqatigiiffippassuit, nunanit alla-niit attartorneqarlutik Imarpik qulaallugu timmisartunut mittarfinnut timmisartuussisartut, imaluun-niit angallavinni angalatinneqarlutik Imarpik qulaallugu timmisartunut mittarfinnut taakkununga ilaasunik Kalaallit Nunaata iluani ingerlaqqittussanik timmisartuussisartut mininneqarput. Ingerlat-seqatigiiffiit attartortitsisartut saniatigut 2006-imi aamma minnerpaamik Arctic Travel Group aam-ma Air Iceland angallavinni timmisartuussisarput. Taamaalilluni Kangerlussuup Narsarsuullu tikif-fissatut orninneqartarnerannut kisitsisitigut paasissutissat kukkulluinnartut atorneqarput. Pingaartu-mik Kangerlussuarmut tunngatillugu naliliinerit annertuumik missiliorneqarput, umiarsuit sinersor-lutik takornariartitsisartut paasissutissaataat naapertorlugit, umiarsuit sinersorlutik takornariartitsi-sartut amerlasuut ilaasuisa Kangerlussuaq taarseraaffigisarmassuk, aammalu 2006-imi Arctic Travel Groups-ip takornariaqarnermi suliniuteqarneranut qitiusimalluni.

Tassani ilaatigut tunngavissaq, Kangerlussuarmi mittarfiup ataatsimiittarfit-tut/ataatsimeersuarterfittut atorneqarnerani peqataanarlutik ilaasartunit amerlasuut Nuummur ima-luunniit Ilulissanut nuunneqarsinnaanissaannut tunngasoq eqqaaneqarpoq. Kangerlussuarmi ataatsi-miittarfiit/ataatsimeersuarterfiit ornigarneqarnerat timmisartumik ilaasartut ikittuaraannarsuit siunnerfigisarmassuk, Assartuussineq pillugu Isumalioqatigiissitap isiginianngikkaa malunnarpoq. Timmisartumik Kangerlussuarmut ilaasartut amerlanersarujussui sersersuaq imaluunniit umim-mappassuit tuttorpassuillu, taakkuluunniit tamaasa misigisassarsiorfiginiarlutik takornariaasartut, kiisalu Imarpik qulaallugu mittarfik 100%-ingajammik qularnaassuseqartoq aqqutigalugu umiar-suarnut sinersorlutik takornariartitsisartunut ikiniarlutik niuniarlutilluunniit Kangerlussuarmut tikit-tartut malunnarpoq. Pissutsit taakku arlaalluunniit Nuup Mittarfiani atuuttutut oqaatigineqarsin-naanngilaq.

Tamanna tunngavigalugu Assartuussineq pillugu Isumalioqatigiissitap kaammattorneqassaaq, tim-misartunut ilaasartut Kangerlussuarmut angalasarnerannut siunertat pillugit paasissutissanik sulia-qaqquillugu. Taamatuttaaq Assartuussineq pillugu Isumalioqatigiissitap kaammattorneqassaaq, u-kiuni kingullerni Kalaallit Nunaanni takornariartartut ineriartornerat, aammalu takornariat ornigas-sanut assigiinngitsunut agguarneqartarnerat pillugu paasissutissanik pissarsiniaqqullugu.

Aamma Assartuussineq pillugu isumalioqatigiissitap GTE suleqatigalugu Kalaallit Nunaanni takornariartarfiit pioreersut suut siunissami takornariartartussanut annertuumik pilerinaatilittut ineriartortinneqarsinnaanersut nunat tamat akornanni misissuiffigisariaqarpaa.

Immikkoortut pingajuanni oqaatigineqarpoq, inuussutissarsiornermi suliassanik annertuumik piler-sitsisoqassappat, innuttaasunik Nuummut Ilulissanullu eqiterutsitsinerup unitsinnissaa ”ilimanar-luarsinnasoq”. Taamatut oqaasertaliineri paasinarpoq, inuussutissarsiutitigut suliat matuma siulia-ni taaneqartut tunngavigalugit inuussutissarsiutinik annertuumik ineriartortitsisoqarsinnaanera As-sartuussineq pillugu Isumalioqatigiissitap upperinnigikkaa. Assartuussineq pillugu Isumalioqatigiis-sitap taamatut ineriartortitsinissaq upperinnigikkuniuk, aningaasaqarnikkut imminut nammassinnaa-nermik anguniagaqarneq qanoq ililluni Kalaallit Nunaanni piviusunngortinneqarsinnaanersaq pillu-gu Assartuussineq pillugu Isumalioqatigiissitaq nassuiaaqquneqarpoq. Tassani soorunami nammi-nersulernerup eqqunneqarnerata kingorna Namminersorlutik Oqartussat kommunillu aningaasaqar-nikkut imminut nammassinnaanissamik annertuumik siunnerfeqarlutik sulinerat eqqarsaatigineqas-saaq. Assartuussineq pillugu Isumalioqatigiissitap sulinerani tamanna tunngavigineqanngippat, pi-sortat immikkoortunut pilersaarutaat allat aamma Assartuussineq pillugu Isumalioqatigiissitap iner-niliineri/inassutai imminnut ataqatigiinnaviangillat.

Skema 1-imi attaveqaatit ilusiligaanerisa pioreersut saniatigut mittarfeqarnikkut ilusiliassaasinnaa-sunut tallimat assersuutigineqarput, assersuutinilu taakkunani tallimaasuni tamaginni Nuup mittar-fiata 2200 m-inut imaluunniit 1799 m-inut tallineqarsinnaanera ilaatinneqarpoq. Tamanna malugi-niarnartorujussuuvoq, tassami Nuup Kommunerisimasaata inassuteqaataani, 2008-p naaneraneer-sumi 1119 m-inut talliliinissaq ilanngunneqarsimanngimmat. Tamannattaq aamma Ilulissat mittar-fiannut atuuppoq, tassami mittarfik 1199 m takussutissiamut ilaatinneqarsimanngitsutut isikkoqar-poq. Illuatungaatigut aamma Kalaallit Nunaata sinnerani Kangerlussuarmi mittarfiup minnerpaamik takeqataanik misissuisoqartussaanninnera eqqumiiginarpoq, tassani Assartuussineq pillugu Isuma-lioqatigiissitap Kangerlussuarmi mittarfiup atorunnaarsinneqarsinnaaneranut periarfissat taakkar-tormagit.

Kiisalu matuma kinguliani kapitali 7-imut, aqqusinertigut angallannermut tunngasumut oqaaseqaatit innersuussutigineqarput.

Kapitali 5: Umiarsuarnik angallassineq: ajornartorsiutit pingaarnerit

Immikkoortoq 5.1-imi nassiussanik imaatigut angallassinermi ukiunut 20-nut atuuttussanik kiffartuunneqarnissamik isumaqatigiissusiortoqarsimanera pissutigalugu illoqarfinnut minnernut nunaqarfinnullu assartuussinerup annertunerusumik misissuiffigineqarnissaanut Assartuussineq pillugu Isumalioqatigiissitaq tunngavissaqarsorinngimmat, tamanna annertuumik eqqumiiginarpoq. Iluseq pioreersaq naapertuutitsinngitsutut/inuiaqatigiit aningaasaqarnerannut pitsaanngitsutut isumaqarfigineqarpat, RAL-ip Namminersorlutik Oqartussanit 100%-imik pigineqarnera, aammalu Namminersorlutik Oqartussat iluminni aaqqiissutissamik pitsaanerpaamik nassaarniartariaqarnera maluginiartariaqarpoq.

Tamatumunnga atatillugu maluginiartariaqarpoq, avannamut Upernavimmiit kujammut Nanortalimmut Kangerlussuaq kisimi sikoqannginnerata nalaani qaammammut marloriarluni nassiussalerisumik umiarsuaqarneq ajormat, taamaallaalli ukiumut marloriarluni tikinneqartarluni. Tamanna 1992-ip siornatigut sakkutooqarfeqarnerup nalaaneersunit sinneruttutut isumaqarfiginarpoq, aammalu pisariaqartitsinermik tunngavissanilluunniit tunngaveqarnera.

Assartuussineq pillugu Isumalioqatigiissitaq kaammattorneqarpoq, immikkoortuni 5.1-imi aamma 5.2-mi Kalaallit Nunaata iluani imaatigut angallannerup isumaqatigiissutit minnerit atorlugit neqeroorutigineqarsinnaaneranut periarfissat misissuiffeqqullugit. Assersuutigalugu Qeqqata Kommuniiani ilaasunik sinerissami nunaqarfinnut angallassinermi Nuuk aallaavigineqarpoq, naak suliassaq neqerooruteqarfigitinneqarsimanngikkaluartoq. Ajoraluartumik tamatuma kingunerisaanik Nuuk aallaavigalugu imaatigut angallassinermi tikinnissat akuttunngitsumik taamaatinneqartarput, imaluunniit Qeqqata Kommuniiani avannarpariartorneq malillugu tikittarnerit unnuakkut pinerusarlutik. Suliassaq najukkami neqerooruteqarfigitinneqarsimasuuppat, suliassami ataatsimut angallassinissamut unammillertoqarsimasinaagaluarpoq, kisiannili aamma illoqarfimmit qaninnermiit nunaqarfinnut ilaasunik angallassinissamik siunnersuuteqartoqarsimasinnaagaluarluni. Nuummi, Maniitsumi aamma Sisimiuni angallatit ilaasoqarnissamut akuerisat arlaliupput, taamaattumillu nunaqarfinnut imaatigut angallassineq pitsaanerulersinnaagaluarpoq, pingaartumik silarlunneranut atatillugu. Kisiannili aamma tamanna illoqarfinni qaninnerusuni angallatit ilaasoqarnissamut akuerisat amerlanerulernissaat ilanngullugu qulakkeerneqarsinnaagaluarpoq, taamaalilluni soorlu takornariaqarnermi sullissineq pitsaanerulersinneqarsinnaagaluarluni.

Kapitali 6: Umiarsualiviit ilusiligaanerat: ajornartorsiutit pingaernerit

Kapitalimi tassani aamma inuussutissarsiutinik ineriartortitsinissaq avammullu tunisaqarnermi isertitaqarnissaq taaneqanngimmata eqqumiiginarpoq. Umiarsuarnut imarpik ikaarlugu angalasartunut umiarsualivinnut assartuinerit ikinnerulerpata, tamanna nunap immikkoortuini inuussutissarsiutinik ingerlataqarnermi pissutsinik inuussutissarsiutinillu ineriartortitsinernik ajornerulersitsissaaq. Aalisarnermi inuussutissarsiuteqartut kilisaatini pisaminnik Aasianniit, Sisimiuniit aamma Kalaallit Nunaata kujataaniit sapaatit akunnerannut ataasiarlutik nunanut allanut toqqaannartumik nassiussisinnaajunnaarpata, aammali piffissaq eqqarsaatigalugu kinguaattoortarnissaq (immaqalu akisunerulersitsisarnissaq) naatsorsuutigisinnaalerpassuk, aalisarnermik inuussutissarsiuteqartut isertitaat ineriartortitsinerallu killeqalissapput. Taamatuttaaq assersuutigalugu Sisimiuni umiarsuit sinersorlutik takornariartitsisartut kiffartuunneqarneranni tamanna misigineqassaaq, tamatumalu takornarianit isaatitanut takornariaqarnermillu ineriartortitsinermut sunniuteqarnerlunnissaa ilimagineqarsinnaavoq. Ilanngussami ilaliunneqartumi maluginiarneqassaaq, umiarsuit sinersorlutik takornariartitsisartut Kalaallit Nunaata imartaani angalanerminni Nuuk tikinneq ajormassuk, taamaattumillu Imapik ikaarlugu umiarsuakkut assartukkanik pilersorneqarnerannut Sisimiut tunngavigineqarmat.

Skema 2-mi Nuummi Sisimiunilu umiarsualiviit ilusaannik annertusaanissamut assersuusiani umiarsualiviit marluullutik allilerneqarsinnaanerat taaneqanngimmat eqqumiiginarpoq. Aaqqiissutissami taamaattumi siunissaq qaninnerusooq eqqarsaatigalugu umiarsualiviit aningaasaqarnikkut killissarititaasut naammaginartut atorlugit siunissamut qulakkeerneqarsinnaanerat ilimagineqarsinnaavoq. Taamaattumik Assartuussineq pillugu Isumalioqatigiissitaq kaammattorneqarpoq, umiarsualiviit pioreersut taakku allilerneqarsinnaanerannut tunngavissanik sukumiisumik misissuiffeqqullugu. Skema 2-mi matuma siuliani inuussutissarsiornermi ineriartortitsinissamut suliniutit aallunneqannginnerannut oqaaseqaatit innersuussutigalugit Maniitsumi umiarsuarnut Imapik ikaarlugu angalasartunut talittarfiliorsinnaaneq eqqaaneqanngimmat eqqumiiginarpoq. Nunatsinni talittarfiit tannersaannik sananissap suliarineqarnera eqqarsaatigalugu, umiarsualivimmut tassunga

tassanngaanniillu assartugassat amerlasussaammata, umiarsualiviup taassuma Assartuussineq pillugu Isumalioqatigiissitap suliaanut ilanngunneqarsimannginnera eqqumiiginarpoq. Taamaattumik Maniitsumi aluminiulerfiup talittarfissaata aammalu umiarsuarnut Imapik ikaarlugu angalasartunut talittarfissap ataatsimoortinneqarnissaa nunap iluani umiarsualiviit ilusiligaanissaannut qanoq isumaqassanersoq Assartuussineq pillugu Isumalioqatigiissitamut misissoqquneqarpoq.

Kapitali 7: Aqqusinertigut angallannerit: ajornartorsiutit pingaarnerit

Assartuussineq pillugu Isumalioqatigiissitap allammat, Sisimiut Kangerlussuullu aamma Qaqortup, Narsap Narsarsuullu akornanni aqquserniassat siunissami Imapik qulaallugu timmisartunut mittarfissap (-ssat) siunissami inissiffissaata misissuiffigineqarneranut atatillugu misissuiffigineqassasut, tamanna eqqorsorinarpoq. Taamaattumik Assartuussineq pillugu Isumalioqatigiissitap kaammattorneqarpoq, kapitali 7, aqqusinertigut angallannermut tunngasoq annertusillugu kapitali 4-mut, silaannakkut angallassinermut tunngasumut ilannguteqqullugu. Qeqqata Kommunia soorunami Sisimiut Kangerlussuullu akornanni aqquserniassap pillugu Assartuussineq pillugu Isumalioqatigiissitamut ilisimatitsissuteqarnissamut piareersimavoq.

Kapitali 8: Eqaassuseq

Kiisalu inuussutissarsiutinik ineriartortitsinissap isumalluutaasinnaasullu annikitsuinnarmik aaneqarput, ajoraluartumilli taakku kapitalinit angallannermi teknikkimut tunnganerusunit kinguliuinneqarput. Taamaalluni inuussutissarsiutitigut suliniutissat Assartuussineq pillugu Isumalioqatigiissitap angallannermik misissuineranut ilaatillugit taaneqanngillat, soqutaarpiannigitsutulli oqatigineqaannarlutik.

Immikkoortoq 1-imi soqutigisaqannginneq tamanna malunnarluinnarpoq. Tassani Kommuneqarfik Sermersuumi aatsitassarsiorfiulersinnaasut kisimik eqqaaneqarput, taakkunungalugu aatsitassarsiorfiit Aatsitassanut Pisortaqarfiup allattukkamini ilaatinngisai ilanngunneqarlutik. Akerlianik kommunini allani pingasuusuni aatsitassarsiorfissat, kiisalu uuliamik ujarlernissat, tassungalugu ilanngullugu 2010-mi misileraalluni qillerinissat taaneqanngilluinnarput. Assartuussineq pillugu Isumalioqatigiissitap aatsitassarsiorfiulersinnaasut, aammalu uuliamik/gassimik piaanerusinnaasut, Assartuussineq pillugu Isumalioqatigiissitamut ilaasortat Nuup illoqarfianut tikillattaarnerinnarminni ilisimasaannit annertunerusumik sammisimasariaqaraluarpai.

Imm. 2-mi Assartuussineq pillugu Isumalioqatigiissitap ukiuni 50-ini tulluuttuni nunasseriaatsip allannguuteqarnissaanik takusaqarsinnaanngilaq, tamannalu suliffeqarfiit namminersortut Maniitsumi aluminiuliorfissamik misissuinerannut, Qeqertarsuup avataani uuliamik ujarlerluni qillerinerannut aammalu nunap iluani aatsitassanik ujarlernernut assigiinngitsunut aningaasarpassuanik millionilikkaanik atuinerannut naleqqutinngilaq. Taamaattumik Assartuussineq pillugu isumalioqatigiissitap aammaloarluni kaammattorneqarpoq, inuussutissarsiutit isumalluutaasinnaasut inuussutissarsiutinillu ineriartortitsinissap pimoorunneroqqullugu.

Kapitali 9: Inuiaqatigiit aningaasaqarneranni iluanaarutissat

Kapitalimi immikkoortut pingaarutillit takuneqarsinnaapput, taakkunanilu ilaatigut Namminersorlutik Oqartussat sulinissamut malitassiami ”aningaasaqarnikkut nammineernissaq”

pingaaruteqartuusut, kiisalu attaveqaatit ataatsimut isigalugit aningaasaqarnikkut suliassanut ineriartortitsinissamullu killissatut piumasaqaatit pilersitseqataanissaat ineriartortitseqataanissaallu iluaqutigineqassasut erseqqissaatigaat. Kapitalini matuma siulianiittuni tungavissat pingaaruteqarluinnartut taakku ilannguteqqullugit Assartuussineq pillugu Isumalioqatigiissitaq kaammattorneqarpoq.

Kapitali 10: Siornatigut misissueqqissaartarnernut naleqqiullugu assigiinngissutit

Angallassinissamut ilusiliassap, angallasseriaatsinik assigiinngitsunik tamanik ilaatitsiviusinnaasup, angallannermi piffissaliussanik angallannernullu aningaasartuutinik ilanngussiviusinnaasup atorneqarnissaata pingaaruteqassusia kapitalimi erseqqissarneqarpoq. Tamanna pingaaruteqartorujussuartut isumaqarfiginarpoq, aammalu siunissami angallannerup ilusissaani soorunami ilusiliami tassani tunngavissiarineqartut, aammalu assersuutigalugu angallannermut piffissaliussanut angallannermilu aningaasartuutitut paasisutissat ilanngunneqartut tunngavigineqartariaqarput. Tamatumunnga atatillugu angallannermi ilusiliami isummat ilusilersuinerillu saqqummiunneqarnissaannut oqaaseqarfigineqarnissaannullu nunap immikkoortuisa periarfissinneqarnissaat pingaaruteqarpoq. Assersuutigalugu angallannermi piffissaliussat sinerissami piffissaq eqqorlugu tikittoqarsinnaannginneranut naleqqussarneqartariaqarput, assersuutigalugu sila pissutigalugu Nuup mittarfia angallannermi piffissaliussat eqqorlugit angalasarnermut naleqqiullugu ullunik unnuanillu arlalinnik utaqqiffiusariaqarsinaammat.

Qeqqata Kommunanit Assartuussineq pillugu Isumalioqatigiissitap suleqqinnissaa qilanaarineqarpoq, aammalu suliamut ilaateqqinneqarnissaq qilanaarineqarluni, taamaalilluni Assartuussineq pillugu Isumalioqatigiissitap Nuup avataani assartuinnermi pissutsinut inuussutissarsiutinillu ineriartortitsinermut ilisimasaat annertusisussaammata.

Inussiarnersumik inuulluaqqusillunga

Hermann Berthelsen
Borgmester